

# Pencarian MH370 sehingga 29 Mei

BH 24/05/18 ms. 17

➔ Kerajaan setuju permintaan Ocean Infinity Limited habiskan operasi di kawasan seluas 7,000km persegi

**Oleh Suhaila Shahrul Annuar**  
cnews@nstp.com.my

✦ Putrajaya

**K**erajaan bersetuju untuk melanjutkan tempoh pencarian penerbangan MH370 sehingga 29 Mei ini, kata Menteri Pengangkutan, Anthony Loke Siew Fook.

Beliau berkata, ia dipersetujui kerajaan atas permintaan syarikat penerbangan dasar laut berpangkalan di Amerika Syarikat, Ocean Infinity Limited, yang bertanggungjawab melakukan pencarian bangkai pesawat itu ketika ini.

"Keputusan Jemaah Menteri terdahulu melanjutkan pencarian sehingga 6 Mei lalu, memandangkan pencarian masih negatif, minggu lalu, Ocean Infinity meminta Kerajaan Malaysia untuk melanjutkan pencarian hingga 29 Mei ini.

"Prinsip pembayaran kepada pencarian ini tetap berdasarkan terma *No Cure, No Fee* (tiada penemuan, tiada bayaran).

"Kita harap ada perkembangan positif dalam seminggu ini, jika sebaliknya, keputusan sama ada diteruskan atau tidak, akan ditentukan nanti," katanya pada sidang media di sini, semalam.



Memandangkan pencarian masih negatif, minggu lalu, Ocean Infinity meminta Kerajaan Malaysia melanjutkan pencarian hingga 29 Mei ini dan ia tetap berdasarkan terma *No Cure, No Fee* (tiada penemuan, tiada bayaran)"

**Anthony Loke Siew Fook,**  
Menteri Pengangkutan



**Keratan akhbar BH**  
pada 8 Mac 2014.

Beliau berkata, sehingga 6 Mei lalu, operasi pencarian Ocean Infinity Limited sudah merangkumi keluasan sehingga 76,000 kilometer (km) persegi lantai Lautan Hindi.

"Ocean Infinity Limited sudah melengkapkan kawasan pencarian asal merangkumi keluasan 25,000 kilometer persegi, selebihnya adalah dipanggil kawasan pencarian tambahan yang dikehendaki syarikat berkenaan.

**Laporan penuh ambil masa**

"Jadi apa yang dikehendaki Ocean Infinity Limited bagi lanjutan sehingga 29 Mei ini adalah untuk menghabiskan pencarian di kawasan seluas 7,000 km persegi lagi," katanya.

Ditanya bila laporan penuh siaran MH370 dapat dikeluarkan, Loke berkata, ia akan mengambil masa memandangkan proses pencarian dan siasatan masih berjalan.

"Apa yang saya boleh katakan, kita komited untuk memberi la-

poran siasatan yang telus. Laporan penuh akan diberikan kepada awam, tetapi masih tidak dapat dipastikan bila ia dapat dikeluarkan kerana siasatan masih berjalan. Setiap perincian siasatan akan kita siarkan secara terbuka kepada awam," katanya.

**Temui MAVCOM**

Dalam pada itu, mengulas mengenai penetapan harga siling bagi tambang penerbangan domestik ken-dalian Suruhanjaya Penerbangan Malaysia (MAVCOM), katanya, beliau akan bertemu suruhanjaya itu dalam masa terdekat.

"Buat masa ini belum ada sebarang perkembangan terkini, dan saya akan jumpa MAVCOM dalam masa terdekat. Selain itu, dalam masa satu atau dua minggu ini, saya akan melakukan perjumpaan dengan semua agensi di bawah Kementerian Pengangkutan termasuk Jabatan Pengangkutan Jalan (JPJ)," katanya.